

**PADEPA**  
PRAYMER



2 0 0 5



ANG

---

BAGONG

---

HUKBONG BAYAN

*Ang praymer na ito ay bahagi ng ikalawang kategorya (Hinggil sa mga Patakaran at Paninindigan ng Rebolusyonaryong Kilusan) sa kurikulum ng Pambansa-Demokratikong Paaralan o PADEPA. Layon ng pangmasang araling ito na ipakilala, sa maikli subalit kumprehensibong paraan, ang batayang mga patakaran at paninindigan hinggil sa Bagong Hukbong Bayan bilang siyang pangunahing sandata ng Partido Komunista ng Pilipinas at ng sambayanang Pilipino para sa armadong pakikibaka sa balangkas ng demokratikong rebolusyong bayan. Ibinibigay ito sa mga nakapag-aral na ng MKLRP (Maikling Kurso sa Lipunan at Rebolusyong Pilipino) at ng mga ESKUM (mga Espesyal na Kursong Masa para sa rebolusyonaryong kilusan ng magsasaka, kababaihan at kabataan). Inaasabang sa paggamit ng angkop at mapanlikhang mga pamamaraan, epektibong maituturo ang praymer sa loob lamang ng tatlo hanggang apat na oras.*

# ANG BAGONG HUKBONG BAYAN



## BALANGKAS:

---

1. Ano ang Bagong Hukbong Bayan (BHB)?
  2. Bakit absolutong pinamumunuan ng Partido Komunista ng Pilipinas ang BHB?
  3. Ano ang pagkakaiba ng BHB sa *Armed Forces of the Philippines* (AFP)?
  4. Ano ang kaibahan ng BHB sa kontrarebolusyong mga hukbong itinayo ng rebisyunistang mga taksil?
  5. Bakit isang hukbong magsasaka sa saligan ang BHB?
  6. Paano itinatag ang BHB? Paano ito nakapagpalakas sa harap ng matinding panunupil ng imperyalismong US at papet na estado?
  7. Anu-ano ang mga batayang prinsipyong gumagabay sa gawaing pampulitika ng BHB?
  8. Ano ang katangian ng disiplinang pinaiiiral sa loob ng BHB?
  9. Ano ang demokrasya sa tatlong larangan?
  10. Sino ang maaaring maging Pulang mandirigma at paano sumapi sa BHB?
  11. Ano ang pangunahing tungkulin ng BHB sa kasalukuyan? Paano tinitiyak ng BHB ang wasto at matagumpay napagsusulong nito?
  12. Ano ang milisyang bayan?
-

*“Kung walang hukbong bayan, wala ni anuman ang mamamayan.”*

– MAO ZEDONG

## **1. Ano ang Bagong Hukbong Bayan (BHB)?**

ANG Bagong Hukbong Bayan o BHB ay ang rebolusyonaryong hukbo ng malawak na masa ng sambayanang Pilipino laban sa imperyalismong US, malaking burgesyang komprador at uring panginoong maylupa.

Ito ang pangunahing sandata ng Partido Komunista ng Pilipinas sa paglulunsad ng armadong pakikibaka sa balangkas ng demokratikong rebolusyon ng bayan.

Lubusang naglilingkod ang BHB sa demokratikong interes ng bayan. Nagtatanggol ito sa sambayanan laban sa masasamang pwersa ng pang-aapi at pagsasamantala at laging nagsisikap na tulungan ang masang Pilipino sa lahat ng paraan sa pang-araw-araw nilang pamumuhay.

Sa saligan, ang BHB ay pwersang panlaban. Kaalinsabay nito, ito rin ay pwersa sa pagpopropaganda, pag-oorganisa sa masa, at produksyon. Pangunahing umaasa ito sa sarili para sa kabuhayan at lohistika.

Ang BHB ang kongkretong ekspresyon ng batayang alyansa ng manggagawa at magsasaka.

## **2. Bakit kailangang absolutong pamunuan ng Partido Komunista ng Pilipinas ang BHB?**

KUNG wala ang absolutong pamumuno ng Partido Komunista ng Pilipinas, hindi magiging mabisang sandata ang BHB laban sa mapagsamantala at mapang-aping mga uri; lalaganap ang maling mga kaisipan at pagkilos sa loob ng hukbong bayan, at sa gayo’y hihina, magkakawatak-watak at madali itong magagapi ng kaaway.

Ang Partido ang namumuno sa baril at hindi ang baril ang namumuno sa Partido. Tinitiyak nito ang pamamayani ng rebolusyonaryong pulitika sa lahat ng gawain ng BHB at ang tuluy-tuloy na pagbaka sa adbenturismong militar at kolaborasyonismo.

Ang absolutong pamumuno ng Partido ang nagtitiyak na ang hukbong bayan ay magiging isang makapangyarihang haligi ng rebolusyonaryong kapangyarihan ng mamamayan hindi lamang sa yugto ng demokratikong rebolusyong bayan kundi hanggang sa yugto ng sosyalistang rebolusyon.

### **3. Ano ang pagkakaiba ng BHB sa *Armed Forces of the Philippines* (AFP)?**

ANG BHB ay isang rebolusyonaryong hukbo na naglilingkod sa sambayanan, samantalang ang *Armed Forces of the Philippines* o AFP (kasama na ang pulisya at mga pwersang paramilitar) ay isang sandatahang naglilingkod sa mga naghaharing uri. Ito ay reaksyunaryo, papet, pasista at bulok sa kaibuturan.

Ang AFP ay reaksyunaryo sapagkat hinahadlangan nito ang adhikain ng sambayanang Pilipino para sa tunay na kalayaan at demokrasya.

Ang AFP ay isang papet na sandatahan sapagkat sunud-sunuran ito sa mga utos, kapritso at ganid na interes ng amo nitong imperyalistang US at lokal na mga naghaharing uri.

Ang AFP ay pasista sapagkat lubhang mahaba na ang rekord nito sa pagsupil sa demokratikong mga karapatan at mithiin, at sa rebolusyonaryong pakikibaka ng sambayanang Pilipino. Hindi na mabilang ang krimen ng AFP sa mamamayan, gaya ng tortyur, pananalbeyds at masaker; maramihang pagpapalikas, panununog, at pambobomba; panggagahasa sa kababaihan at iba.

Ang AFP ay bulok at tiwali sa kaibuturan sapagkat lagi na itong sangkot sa mga kabulukan at katiwalian ng reaksyunaryong estado at pamahalaan. Ang pangungurakot sa napakalaking pondo sa depensa, bentahan ng armas at ismagling; pangingikil sa tsekpoyn, ilegal na pagtotroso at *kidnap-for-ransom*, pasugal, droga at prostitusyon--- ilan lamang ito sa mga kalakarang sindikato na matagal nang laganap sa AFP at mga supplementaryong pwersa nito.

Sa esensya, ang AFP ay naglilingkod sa mga naghaharing uri at nagtatanggol sa sistemang malakolonyal at malapyudal. Ito ang mersenaryong hukbo ng estado na ginagamit sa panunupil at pandarahas sa mamamayan, at sa pagtatanggol sa interes ng mga reaksyunaryong uri.

Sa kabilang banda ang BHB ay taos-pusong naglilingkod sa pagkakamit ng tunay na kalayaan at demokrasya ng sambayanan. Binubuo ito ng mga mandirigmang kusa at mulat na sumapi rito para isulong ang rebolusyonaryong armadong pakikibaka. Sa gayon, ang BHB ay ganap na bago at rebolusyonaryo kung ihahambing sa AFP na isang luma at nabubulok nang reaksyunaryong hukbo.

#### **4. Ano ang kaibahan ng BHB sa kontrarebolusyonaryong mga hukbong itinayo ng rebisyunistang mga taksil?**

SALIGANG naiiba ang BHB sa nagpapanggap na mga hukbong bayan tulad ng Hukbong Mapagpalaya ng Bayan (HMB), Rebolusyonaryong Hukbong Bayan (RHB), Revolutionary Proletarian Army–Alex Boncayao Brigade (RPA-ABB), at Cordillera People’s Liberation Army (CPLA) na itinayo ng mga rebisyunistang taksil sa rebolusyon.

Ang BHB ay matatag na nagsusulong sa demokratikong rebolusyong bayan at mahigpit na nakaugat sa masa. Samantala, ang mga huwad na hukbong bayan ng mga rebisyunistang taksil ay maliliit na bandidong pangkat na ginagamit ng estado para sa kontrarebolusyong mga pakana, panggugulo at panlilinlang sa masa, at kriminal na mga aktibidad.

## **5. Bakit isang hukbong magsasaka sa saligan ang BHB?**

NAGMUMULA sa uring magsasaka ang pinakamaraming mandirigma ng BHB. Umaayon ito sa obhetibong kondisyon na ang pinakamalaking bahagi ng ating populasyon ay binubuo ng masang magsasaka at rebolusyong agraryo ang pangunahing nilalaman ng demokratikong rebolusyon bayan. Sa esensya, ang demokratikong rebolusyon bayan ay isang digmang magsasaka na pinamumunuan ng uring manggagawa. Sa pagsusulong nito sa pamamagitan ng matagalang digmang bayan, napupukaw, naoorganisa at napapakilos ang pinakamaraming bilang ng uring magsasaka para sa armadong pakikibaka.

Sa kanayunan, ang BHB ay masigasig na nakikibaka upang baguhin ang atrasadong mga nayon tungo sa pagiging pinakamaunlad na muog sa pulitika, militar, ekonomya at kultura ng demokratikong rebolusyon ng bayan.

Upang matupad ang dakilang tungkuling ito, tinatanganan ng BHB ang rebolusyong makauring linyang antipyudal sa kanayunan. Pangunahing umaasa ito sa masa ng maralitang magsasaka, manggagawang bukid at mababang panggitnang magsasaka; kinakabig ang mga panggitnang magsasaka; ninunyuutralisa ang mayamang

magsasaka; at inihiwalay ang sagadsarin at despotikong mga panginoong maylupa.

**6. Paano itinatag ang BHB? Paano ito nakapagpalakas sa harap ng matinding panunupil ng imperyalismong US at papet na estado?**

ITINAYO ng Partido Komunista ng Pilipinas ang BHB noong Marso 29, 1969 sa gabay ng Marxismo-Leninismo-Maoismo (MLM). Ang BHB ay bunga ng unang dakilang kilusang pagwawasto na inilunsad ng muling-tatag na Partido. Itinakwil nito ang rebisyunismo at oportunismo ng mga lideratong Lava at Taruc ng lumang pinagsanib na partido (PKP-PSP) at ng bandidong pangkating Taruc-Sumulong ng HMB.

Ang pagtalima ng Partido at hukbong bayan sa MLM bilang teoretikong gabay sa pagsusulong ng demokratikong rebolusyong bayan ay maituturing na siyang pinakamaningning at pinakamalaking tagumpay sa ideolohiya.

Sa pamamagitan naman ng puspusan at masusing gawaing pampulitika sa hanay ng mamamayan at sa mahigpit na pagtalima sa prinsipyo ng paglilingkod sa sambayanan at linyang masa, higit na napalapit sa masa ang hukbong bayan at nakapag-ugat sa kanila. Tinatangkilik nila ang BHB bilang sarili nilang hukbo na siyang tanging maaasahan sa paglutas ng kanilang mga saligang suliranin.

Puspusang nagpunyagi ang BHB sa armadong pakikibaka at pagbubuo't pagpapalakas sa sarili. Nakapagpalawak ito sa iba't ibang dako ng bayan, nakapagtayo ng mga bagong sona at larangang gerilya. Nakapagbuo ito ng di hamak na daming organisasyong



masa sa hanay ng mga magsasaka at ng mga organo ng demokratikong kapangyarihang pampulitika sa ilang piling lugar sa kanayunan. Nakapaglunsad ito ng rebolusyong agraryo, at nagsagawa ng taktikal na mga opensiba laban sa mga pwersa ng AFP, pulisya at paramilitar na siyang pangunahing pinagkukunan nito ng armas. Nagawa rin nitong labanan at biguin ang mga kampanya at operasyong kontra-rebolusyonaryo na inilunsad ng kaaway.

Sa larangan ng organisasyon, nakapagparami ang BHB ng tauhan mula sa pinakamabubuting anak ng bayan sa hanay ng masang magsasaka, manggagawa, petiburgesya at iba pang sektor ng lipunan. Mula sa 60 tauhan at siyam na mataas na kalibreng baril, nakapagpalaki ito ng mga pormasyon tungo sa antas platun at kumpanya.

Noong dekada '80 dumanas ang BHB ng malalaking pinsala at pag-atras bunsod ng maling linya ng di napapanahong pagpapalaki ng pormasyon ng hukbo, adbenturismong militar at insureksyunismong lunsod.

Iwinasto ng Partido ang paglihis at pagkakamaling ito, at pinamunuan ang paglulunsad ng Ikalawang Dakilang Kilusang Pagwawasto mula 1992 hanggang 1998. Muling tumahak sa tamang landas ang BHB at muling nakapagpalakas ayon sa linya ng bagong demokratikong rebolusyon at matagalang digmang bayan.

Sa kasalukuyan, nagkakamit ng malaki at makabuluhang mga tagumpay ang BHB sa pagsusulong ng armadong pakikibaka, rebolusyong agraryo at pagbubuo ng baseng masa. Patuloy itong naglulunsad ng mga pag-aaral at pagsasanay pampulitika at pangmilitar sa ibayo nitong pagpapalakas at upang higit na maging epektibong sandata ng Partido at sambayanan sa pagdurog sa mga kaaway ng bayan.

## **7. Ano ang batayang mga prinsipyong gumagabay sa gawaing pampulitika ng BHB?**

TATLONG batayang prinsipyo ang gumagabay sa gawaing pampulitika ng BHB: ang pagkakaisa ng upisyal at kawal; ang pagkakaisa ng hukbong bayan at mamamayan; at ang paglansag sa tropa ng kaaway at mahusay na pagtrato sa mga bihag.

Ang **pagkakaisa ng upisyal at kawal** ay nangangahulugan ng pagpawi sa mga paraang pyudal sa loob ng hukbo, pagbabawal sa pambubugbog at pang-aabuso, pagpapalakas sa mulat na disiplina at pagsasama sa hirap at ginhawa. Dahil dito, ang buong hukbong bayan ay mahigpit na nagkakaisa.

Ang prinsipyo ng **pagkakaisa ng hukbong bayan at mamamayan** ay nangangahulugan ng taos-pusong paglilingkod sa masa. Mahigpit na ipinapatupad ng BHB ang disiplinang nagbabawal sa pinakamaliit na paglabag sa kapakanan ng mamamayan. Ipinapatupad ng BHB ang masigasig na pagpopropaganda sa masa, pag-oorganisa't pag-aarmas sa kanila, pagtataguyod sa kanilang mga pakikibakang masa, pagpapagaan sa kanilang pasanin sa kabuhayan sa iba't ibang paraan gaya ng gawaing produksyon, at pagsugpo sa mga traydor at taksil na namiminsala sa hukbo at mamamayan. Dahil dito, ang hukbong bayan ay mahigpit na kaisa at malugod na tinatanggap ng mamamayan.

Ang ikatlong prinsipyo ng **paglansag sa tropa ng kaaway at makataong pagtrato sa mga bihag** ay naglalayong papanghinain ang determinasyong lumaban ng kaaway.

Ang mga tagumpay ng hukbong bayan ay nakasalalay di lang sa mga operasyong militar kundi gayundin sa

mahigpit na pagkakaisang panloob, masinop na gawaing masa at paglansag sa tropa ng kaaway.

## **8. Ano ang katangian ng disiplinang pinaiiral sa loob ng BHB?**

ANG disiplina ng mga pinuno at mandirigma ng BHB ay isang mulat na disiplinang ginagabayan ng MLM, ng Partido at ng pang-organisasyong prinsipyo ng demokratikong sentralismo.

Ang mga pinuno at mandirigma ay kusang-loob na nag-aalay ng kanilang sarili at buhay para sa pagsusulong ng demokratikong rebolusyong bayan sa patnubay ng Partido. Ito ang sandigang kamulatan sa pagpapatupad ng disiplina sa organisasyon at prinsipyo ng demokratikong sentralismo.

Sa organisasyon, nangangahulugan ang disiplina ng hukbong bayan na: ang indibidwal ay nakapailalim sa buong hukbo; ang minority ay nakapailalim sa majority; ang nakabababang antas ay nakapailalim sa nakatataas na antas; at ang lahat ng kasapi ay nakapailalim sa Komisyong Militar ng Komite Sentral ng Partido. Ang mga kumander ay may karapatang magdesisyon sa mga kalagayang gipit.

Ang mga pinuno at kawal ng BHB ay may mahigpit na tungkuling sundin ang Tatlong Pangunahing Alituntunin sa Disiplina at Walong Puntong Dapat Tandaan na isinaad ni Kasamang Mao Zedong.

### **Ang Tatlong Pangunahing Alituntunin sa Disiplina:**

1. sundin ang utos sa lahat ng pagkilos
2. huwag kumuha ni isang karayom o hibla ng sinulid mula sa masa

3. ibigay sa kinauukulan ang lahat ng nasamsam

### **Ang Walong Puntong Dapat Tandaan:**

1. magsalita nang magalang
2. magbayad nang tama para sa binili
3. isauli ang lahat ng hiniram
4. magbayad para sa anumang nasira
5. huwag manakit o magmura sa masa
6. huwag manira ng pananim
7. huwag pagsamantalahan ang kababaihan
8. huwag pagmalupitan ang mga bihag

Ang lahat ng paglabag sa mga nabanggit ay gagawaran ng karampatang aksyong pandisiplina.

## **9. Ano ang demokrasya sa tatlong larangan?**

**KAAKIBAT** ng mulat na disziplinang bakal, ipinatutupad ang demokrasya sa tatlong larangan upang ang demokrasya ay lubusang makamit ng mga Pulang mandirigma at maging batayan ng praktikal at kongkretong paggamit ng MLM:

**Demokrasya sa larangan ng pulitika.** May karapatan ang mga kawal na magdaos ng mga pulong at malayang magsalita tungkol sa anumang mahalagang paksa, usapin at suliraning kinakaharap nila kaugnay ng kanilang pagkilos.

**Demokrasya sa larangan ng ekonomya.** May pantay na kalayaang materyal ang mga pinuno at kawal, tulad ng pantay na panggastos at rasyon. May karapatan ang mga kawal na maghalal ng kanilang mga kinatawan upang tulungan ang pamunuan sa pangangasiwa sa kanilang kalagayang materyal. Ang lahat ng pinuno at kawal ay may karampatang magsuri ng mga kwenta sa lahat ng oras.

**Demokrasya sa larangang militar.** Ang mga pinuno ay nagtuturo sa mga kawal; ang mga kawal ay nagtuturo sa mga pinuno; at ang mga kawal ay nagtuturo sa isa't isa sa mga paraan at teknika ng pakikibaka. Hangga't maaari, nagdaraos ng mga pulong bago at matapos ang mga labanan upang maitaas ang kakayanan sa pakikibaka.

Pinatitingkad ang pamumuna at pagpuna-sa-sarili upang itaas ang bisa sa pulitika at pakikibaka ng BHB.

Sa ugnayan ng mga pinuno at kawal, ganap na ipinagbabawal ang mga burges at pyudal na gawi tulad ng pang-aapi. Pinauunlad ang pinakamahasag na ugnayan ng mga pinuno at kawal sa loob ng hukbo upang ang buong hukbo ay magabayan tungo sa pagpapanatili at pagpapauunlad ng pinakamahasag na pakikipag-ugnayan sa masa.

## **10. Sino ang maaaring maging Pulang mandirigma at paano sumapi sa BHB?**

SINUMANG mahasag ang pangangatawan, di bababa sa 18 taong gulang, anuman ang kasarian, lipi, nasyunalidad o relihiyon, may kakayahang lumaban at handang lumahok sa matagalang armadong pakikibaka laban sa reaksyunaryong kapangyarihang estado ay maaaring maging kasapi ng isang panlabang pangkat ng BHB.

Ang mga lokal na komite ng Partido, mga sandatahang yunit ng BHB at rebolusyonaryong mga organisasyong masa ay magkukusa sa pagtanggap ng mga indibidwal at kolektibong kahilingan sa pagsapi sa BHB at magrerekomenda ng mga rereklutahing mandirigma.

Gagawa ang BHB ng regular na pagsusuri sa uring pinagmulan, pagtupad sa tungkulin at kapasahang lumaban ng lahat ng mandirigma nito upang patuloy na mapataas ang kanilang rebolusyonaryong katangiang proletaryo.

## **11. Ano ang pangunahing tungkulin ng BHB sa kasalukuyan? Paano tinitiyak ng BHB ang wasto at matagumpay na pagsusulong nito?**

ANG pangunahing tungkulin ng BHB sa kasalukuyan ay durugin ang kontrarebolusyonaryong AFP at isulong ang matagalang digmang bayan hanggang tagumpay. Hindi ito dapat humiwalay kailanman sa landas ng rebolusyonaryong armadong pakikibaka hangga't naghahari ang imperyalismong US, pyudalismo at burukratang kapitalismo sa lipunang Pilipino.

Dapat mahigpit na ipatupad ng hukbong bayan ang estratehikong prinsipyo ng pagkubkob sa kalunsuran sa pamamagitan ng pagtatayo ng mga base sa kanayunan at pagsulong nang parang alon mula sa mga ito. Sa pagkakaroon lamang ng matatatag na base sa kanayunan maaaring maglunsad ang BHB ng matagalang digmang bayan.

Sa kasalukuyang yugto ng DRB, kailangang mahigpit na tanganan ng BHB ang prinsipyo ng pakikidigmang gerilya batay sa papalawak at papalalim na baseng masa. Kaakibat nito, kailangang patuloy na ipatupad ng BHB ang gawaing masa, gawaing pangkultura at gawaing produksyon habang nagpupunyagi ito sa paglulunsad ng mas marami, mas madalas at mas malalaking taktikal na opensiba.

Kailangang ilunsad ang mga taktikal na opensiba upang pukawin ang mamamayan para sa rebolusyonaryong paglaban, makapagparami ng armas, ipagtanggol ang demokratikong kapangyarihan ng mamamayan at papanghinain at wasakin ang kapangyarihang pampulitika at lakas pangmilitar ng kaaway.

## 12. Ano ang milisyang bayan?

ANG milisyang bayan ay partaym na yunit ng hukbo sa hanay ng masa na nagtatanggol sa lokalidad at tumatayo bilang bag-as ng sandatahang lakas ng mamamayan sa baryo, kasama ang mga pangkat sa depensa ng mga samahang masa. Sila ang balon na pinagkukunan ng mga pultaym na mandirigma ng BHB.

Ang pangunahing mga tungkulin ng milisyang bayan ay ang pangangalaga sa rebolusyonaryong kapayapaan, kaayusan at seguridad ng rebolusyonaryong pwersa sa baryo; ang pagtulong sa mga plano't operasyong militar ng BHB at sa pagsasanay pulitiko-militar ng mga pangkat sa depensa ng mga samahang masa.

### SANGGUNIAN:

- 
1. Patnubay para sa mga Kadre at Kasapi ng PKP, Ikaapat na edisyon, 1977
  2. Armando Liwanag, Tagapangulo ng KS, PKP, *Mapulang Pagtupugay sa BHB*, Pahayag para sa ika-25 anibersaryo ng BHB, 1994
  3. Armando Liwanag, Tagapangulo ng KS, PKP, *Labanan ang Kaaway Hanggang sa Ganap na Tagumpay sa Bagong Demokratikong Rebolusyon!* Pahayag para sa ika-30 anibersaryo ng BHB, 1998
  4. *Muling Pagtibayin ang Atinig mga Saligang Prinsipyo at Iwasto ang mga Pagkakamali*, Komite Sentral, Partido Komunista ng Pilipinas, Hulyo 1992
-

INIHANDA NG **PAARALANG PRIMARYA NG PARTIDO (PKP-MLM)**  
PARA SA **PAMBANSA-DEMOKRATIKONG PAARALAN**  
NOBYEMBRE, 2005